

220250

III

Mag. St. D.

1882. III. 64.

Decisio Rotae Romanae. - Leopoliën.  
Cănonicatus Georgii de Meliorucis.

1719.

Feet. 6487.

220250/6784

**V**acato nupèr Canonicatu Metropolitanae Ecclesiae Leopoliensis, cuius collatio, & prouisio ad Sedem Apostolicam pertinebat, placuit Sanctissimo de eodem prouidere D. Equitem Georgium de Meliorucijs in Petrella Vvientzlavvski, Diocesis Cracouientis, Nobilem, Canonicum Chelmensem, Philosophiae Doctore, & vtriusq; Iuris laurea decoratum; Cumque contra ipsum rumor increuerit exceptionum, & obstaculorum in executione Bullarum, & Pontificiae gratiae ex defectu antiquae Nobilitatis Polonae, consaltus extiti ego infra scriptus, vt circa hanc controuersiam meos sensus pro veritate exponerem, & in eiusdem veritatis obsequium, eam Sententiam amplectendam esse censeui, quod nempè dicto Prouiso Apostolico executio Bullarum, & Canonicatus possessio, nequaquam impediri valeat, non obstantibus Constitutione Apostolica san: mem: Leonis X., & illius confirmatoria, & declaratoria san: mem: Pauli III., ac alijs exceptionibus, singularitèr in illarum confutatione recensendis.

142

In praefata Constitutione, ac literis Apostolicis san: mem: Leonis X. relatis per extensum in opere, cuius titulus = *Ius Regni Poloniae* = Auctore D. Nicolao Zalaszowski fol. 892. tom. 1. sub Dat. Romae apud S. Petrum anno 1515. pridie Kal. Augusti sancita legitur, quod Canonicatus Praebendae, & Dignitates in Metropolitana, & Primatiali Ecclesia Guesnensi, ac in quatuor eius Suffraganeis nimirum Cracouien., Vladislauien., Posnaniën., & Plocen., non nisi illis, qui de nobili genere ex vtroque Parente procreati forent, conferri possent, quatuor dumtaxat Canonicatibus, & Praebendis in singulis Ecclesijs praedictis, exceptis, de quibus etiam non nobiles, quorum tamèn duo in Sacra Theologia, Magistri, & alij duo in vtroque Iure Doctores esse deberent, prouideri possent.



Hanc Constitutionem Leonis X. approbavit, ampliauit, & declarauit Paulus III. per eius literas Apostolicas, relatas per supracitatum Auctorem fol. 896. tom. 1., & datas sub die 16. Octobris 1543., in quibus dictis quatuor Praebendis, & Canonicatibus conferendis etiam Ignobilibus in Sacra tamèn Theologia, vel in vtroque Iure, vt supra, graduatis, addidit quintam Praebendam conferendam, Medicinae Magistro, & voluit, quod praefatae quinque Praebendae non nisi Ignobilibus, vt supra tamèn graduatis, conferrentur, & essent aequales in redditu, alijsque praerogatiuis coeteris Praebendis, & Canonicatibus Nobilium.

In istis autèm Pontificijs Constitutionibus nullum constitui posse exceptionis fundamentum, ad impediendam executionem literarum Apostolicarum fauore dicti D. Prouisi, clarè liquet ex eo, quod eadem Constitutiones Apostolicae restrictae, & limitatae leguntur ad

solas Metropolitanam, & Primatiale[m] Ecclesiam Gnesnen., & 11-  
 lius Suffraganeas Cracouien., Vladislauien., Pofnanien., & Plo-  
 cen., vnde ad Metropolitanam Ecclesiam Leopoliensem, de cuius  
 Canonicatu nunc agitur, extendi nequeunt, etiam si admittamus in  
 illa concursum earumdem rationum, & motiuorum, ex quibus su-  
 pra relati Pontifices ad præfatas Constitutiones deuenierunt; nam  
 in istis non datur extensio de casu ad casum, & de vna Ecclesia ad  
 aliam, etiam si concurreret æqualitas, imò maioritas rationis, quia  
 sunt gratiæ speciales, strictè, & ad limites concessionis sumendæ, &  
 restringendæ, nedum quia adimunt Summo Pontifici liberam, &  
 absolutam Beneficiorum dispositionem ad fauorem illius, & illo-  
 rum, quos ex personalium virtutum, & meritorum præcellentia,  
 gratificandos fore censeret, verum etiam quia sunt correctoriæ  
 Iuris communis, iuxta quod in collatione præfertim Beneficiorum,  
 & Christi Domini Patrimonij distributione, non tam considerari  
 debet nobilitas Sanguinis, quam morum præcellentia, ac scientia,  
 & virtus, quæ nobilitati generis præferenda est *Hermosill. ad leg.  
 parit. prol. tom. 1. gloss. 3. fol. 15.*, *Paul. Rubeus in discurs. ad studio-  
 sos omnes num. 117.*, & *seqq.*, & *num. 282.*, & *seqq. in principio  
 part. 4. tom. 2. decis. recent.*; Illa enim nobilitas, quæ à suis Maio-  
 ribus procedit, est præsumptiua, illa verò, quæ ex propria virtute  
 ortum habet, est certa *Anfald. conf. 138. per tot.*, *Mascard. de pro-  
 bat. volum. 1. conclus. 1098.*, *Viuian. commun. opin. 197. per tot.*,  
*Paul. Christin. decis. Belgic. decis. 226. per tot. volum. 1.*, & *decis. 5.  
 volum. 5.*, & *ad leg. municipal. tit. 5. art. 1. num. 11.*

Et sanè apud Deum absque Personarum, & generis acceptione summa  
 nobilitas est, clarum esse virtutibus *Tiraquell. de nobilitat. cap. 4.  
 num. 12.*, vbi transcribit aurea verba Diui Hieronymi, quæ hic pa-  
 ritèr transcribenda censui, ibi = *Ille clarus, ille sublimis, ille sit nobi-  
 lis, ille tunc integram nobilitatem suam se seruare putet, si dedignetur  
 seruire vitijs, ab eisque non superari, = & paulò inferiùs = Nulli te  
 umquàm de generis nobilitate preponas, neque obscuriores quoque hu-  
 miliore loco natos, te inferiores putes. Nescit religio nostra personas  
 accipere, nec conditiones Hominum, sed animos suscipit singulorum;  
 seruum, & nobilem de moribus pronunciat. Sola apud Deum libertas  
 est, non seruire peccatis; summa apud Deum nobilitas est clarum esse  
 virtutibus. Quid apud Deum in Viris nobiliùs Petro, qui Piscator,  
 & Pauper fuit? &c.*

Et hanc eandem præcellentiam nobilitatis, proprijs virtutibus com-  
 paratæ, semper anteponendæ nobilitati ex maiorum gestis, & opi-  
 nione promananti, agnouit etiam glor: mem: Sigismundus Poloniæ  
 Rex in eius Regio Diplomate fauore Doctorum, & Lectorum in  
 Alma Vniuersitate Cracouien[s]i, dato de anno 1535, & relato per  
 præfatum *D. Nicolaum Zalaszwski in allegato eius opere = Ius  
 Regni Polonia = dicto tom. 1. fol. 579.*, in quo statuit, vt præfati

Doctores, & Lectores, licet ex ignobilibus Parentibus orti, quas vis dignitates, munera, & officia tam spiritualia, quam secularia, siue senatoria, siue equestria, assequi valerent, addita ratione per hæc verba = *Satius enim est, gestis proprijs florere, quam maiorum opinione vi, nec maior nobilitas est, ea, quæ proprijs virtutibus comparatur &c.*

Ex his autem assequimur, quod præfatæ Apostolicæ Constitutiones san: mem: Leonis X., & Pauli III., nedum tamquam restrictiue, liberae, & absolutæ dispositionis Beneficiorum, quam Summus Pontifex habet, sed etiam correctoriæ Iuris communis, iuxta quod sine personarum, & graduum acceptione, in Ecclesia Dei merita vniuscuiusque æquali lance ponderanda, & retribuenda sunt, strictè accipiendæ veniunt ad nudam literam concessionis, nec vltra Ecclesias in eisdem literis expressas trahendæ *Calderin. consil. 11. sub primo vers. nec obstat de priuilegijs, Paris. cons. 141. num. 15. vers. iterum in huiusmodi dispositione lib. 3., Rot. decis. 645. num. 3., & seqq. part. 3. recent., & alibi passim*, & per consequens cum in illis nulla prorsus fiat mentio de nostra Ecclesia Leopoliensi, non valent aliquem, vel minimum obicem ponere executioni literarum Apostolicarum, & gratiæ Pontificiæ fauore præfati Domini Equitis de Meliorucijs Vvientzlavvski.

Minusquæ vis aliqua fieri potest in eo, quod cum in antiquis Constitutionibus Regni æditis de annis 1496. 1505., & 1510. sancitum reperiretur, quod ad Episcopatus, Prælaturas, & Canonicatus nonnisi Nobiles ex utroque Parente procreati, assumerentur, eadem Constitutiones reassumptæ sub Stephano Rege de anno 1676., ac de anno 1607. extensæ fuerint ad Ecclesias Cathedrales Ruffiæ, & Magni Ducatus Lithuanicæ, vt refert citatus *Zalaszovvski to. 1. à fol. 889. ad fol. 891.*; Quoniam quemadmodum præfatas Constitutiones, & Statuta Apostolicæ confirmationis robore indigere, agnouit Sigismundus Rex, & sub certis conditionibus, & legibus confirmari obtinuit quoad suprâ relatas Ecclesias Metropolitanam, & Primatiale Gnesnensem, eiusque Suffraganeas Cracouien., Vladislauen., Posnanien., & Plocen.; Ità pariformitèr in extentione earundem Constitutionum, & Statutorum ad Ecclesias Cathedrales Ruffiæ, & Magni Ducatus Lithuanicæ recurrendum erat ad Summum Christi Vicarium, & illius assensus, ac Apostolica confirmatio impetranda.

Quia candidè prò veritate meos sensus aperire velle declaravi, coactus fui, in eiusdem veritatis obsequium, præfatas rationes deducere, licet D. Eques Meliorucius prouisus Apostolicus illis minime adherere intendat, sed potius præ viribus, ac strenuè tueri Iura, & prærogatiuas Reuerendissimi Capituli Leopoliensis illiusque E.D. Capitularium, in quorum Albo supremæ dignationi Sanctissimi placuit illum adscribere. Vndè vtrò per ipsum admissa exten-

tensione Bullarum san. mem. Leonis X., & Pauli III. ad Ecclesiam Leopoliensem, ac Regni Constitutionibus, & Statutis, non dubitat ad strictam illorum censuram, executionem Bullarum, & Canonicatus possessionem sibi deberi.

Etenim tam præfatæ Constitutiones Pontificiæ, quàm Constitutiones, & Statuta Regni exigunt, quod quis sit de nobili genere ex utroque Parente procreatus, & talem se esse docet dictus prouisus Apostolicus. Ex authenticis enim, & legitimis Testimonialibus Literis Confalonerij, & Senatus Ciuitatis Castellii olim Tipherni Tiberini dictæ Patriæ D. Equitis Domini Mariæ Meliorucij filij bo. me. Comitis Andrea, Patris D. Prouisi habetur, illius Familiam, & Prosapiam Melioruciam ex Dynasti, & Marchionibus Petrellæ inter antiquiores, & Nobiliores familias eiusdem Ciuitatis connumerari, illamque ferè ab initio currentis millesimi idest à septingentis circiter annis Illustribus Viris, Sago, & Toga conspicuis, effloruisse, Magistratus, supremasque Dignitates Ecclesiasticas, & Seculares, Legationes, Armorum Præfecturas, Arcium Gubernia, Castellanus, Capitaneatus, ceteraque militaria Munia, & Officia in Italia, Germania, & Gallia obtinuisse, & exercuisse, & Militarium Ordinum Crucibus toties insignitam, ac varijs Honorum gradibus decoratam fuisse.

Præfata Ciuitas Tiferni Tiberini, nunc Ciuitas Castellii dicta, in Umbria propè Etruriam est sita, & aliàs in antiqua Etruria comprehensa, ac inter celebriores, nobiliores, & antiquiores Italiæ Vrbes connumeratur; Antiquitùs tamquàm Respublica sub electiuo capite, & Duce regebatur; in rebus Militaribus, ac Bello potens, & hostibus insuperabilis; deindè ob nimis communes rerum, & temporum vicissitudines, ex quibus potentissimæ Respublicæ, & Dominia, ac Imperia Virium diminutionem, & Status variationem, passa fuerunt, ad resistendum Hostibus, quibus vndique appetebatur, se impari agnoscens, suauè iugum Domini Successoris Petri suscepit, & illi spontè se subiecit, vt ex annalium, & Hystoricorum lectura deprehenditur.

Ex qualitatibus tam conspicuæ, antiquæ, & peruetustæ Familiæ, è celebri paritèr, & famosa Ciuitate oriundæ, permotus Serenissimus, ac Potentissimus Rex Augustus II., nunc feliciter regnans, præfatum Dominum Dominicum Mariam Meliorucium Patrem D. Prouisi, qui dulcedine libertatis allectus, in Poloniam se transtulerat, ibique suum Domicilium firmauerat, & Nobilem Mulierem Polonam Matrimonio sibi copulauerat, dictum inquàm Dominum Dominicum Mariam Meliorucium cum suis descendantibus in Comitibus eius solemnis Coronationis inter Nobiles sui regni adscripsit, & ad Nobilitatis prærogatiuas admisit, illumque vltèrius, ac eius Posteros, & descendentes Equites Ordinis Auræ Crucis creauit, vt ex regio Dyplomate expedito sub die 16. Septemb. 1697.

Dùm itaque Prouisus Apostolicus ortum habuit Poloniæ, vndè est insigni-

signitus qualitate volita in concordatis inter Sedem Apostolicam, & Serenissimam Rempublicam Poloniae, quod naturalibus Regni & non exteris, Beneficia conferantur, & nedum est de Nobili genere ex utroque Parente procreatus, prout volunt praefata Constitutiones Apostolicae Leonis X., & Pauli III., sed multos numerat Avos Atavos, & Progenitores Nobiles, & quidem a septingentis circiter annis, nulli dubium erit, quod in illo superlativè nimis concurrant requisita volita ad assecutionem Canonatus Leopoliensis.

Et in hoc benigna ponderatione dignum credimus, quod tam praefata Pontificia Constitutiones, quam Statuta, & Constitutiones Regni, requirunt quidem, quod quis sit de Nobili genere ex utroque Parente procreatus, sed minimè praecipiant, quod Progenitores, Nobiles Poloni esse debeant, & hoc summo Iure, quia sufficere debet, quod ubicumque Natalia sortiti fuerint, sint nobiles iuxta mores, & leges omnium gentium, nimirum quod eorum nobilitas, & Patriae claritate, & virtute gentis exulta sit, quo in casu apud omnes homines, & nationes talis nobilitas splendorem, & dignitatem retinet, ut docet *Tiraquell. de Nobilitat. cap. 37. num. 155. versicul. Ex quibus ibi = Ex quibus intelliges eos esse simpliciter atque ubique Nobiles, qui legibus, & Moribus omnium gentium Nobiles dicuntur, ut qui Regibus, aut aliis antiquo, claroque ac Nobili sanguine sunt prognati; nulla enim gens est, quae non hos Nobiles existimet &c. =*, & successivè post num. 156. ibi = *Absoluta autem Nobilitas numquam loco dimouetur, & ubiuis gentium fuerit, semper altis defixa radicibus, an nris haeret, & eadem apud omnes nationes dignitatem habet &c. =* & rursus post pauca = *Illam verò quae, & Patriae claritate, & virtute Gentis exulta est, apud omnes homines splendorem retinebit =* & consonant verba *Mastrill. de Magistrat. lib. 4. cap. 14. num. 55., & seqq.*

In nihilo obstante obiecto forsàn faciendò, quod in Statutis, & Constitutionibus Regni, ac etiàm in pactis initis inter S. Regiam Maiestatem, & Serenissimam Rempublicam in eius electione, cautum reperitur, quod illi, qui recentè nobiles creabuntur, ad officia, & beneficia ad tertiam progeniem non admittantur. Quoniam D. Dominicus Maria Meliorucius Pater D. Prouisi, non fuit recentè creatus Nobilis, tamquam si ex lato infimae, & abiectae Plebis, fuisset a Regia potestate ad nobilitatem euectus, & assumptus, sed benè tamquam nobilis ex conspicua, & peruetusta externa Familia, ad praerogativas Indigenatus, & Nobilitatis Poloniae admissus, ut literis cubitalibus expressit Serenissimus Rex in praefato eius Regio Diplomate, quod est valdè diuersum à noua, & recenti creatione nobilis, ut agnuit Starouolscius in Descriptione Poloniae sub Verbo Nobilitatis Praerogativa ibi = *Præstabilius autem Nobilem natum esse, quam creatum, & ad nobilitatis praerogativas admissum &c. =* & alia est Nobili-

bilitas incipiens, alia crescens, & alia perfecta, vt ex *Bald. in l. Nobiliores C. de comm. & Merc.*, docet *Tiraquell. de Nobilit. cap. 19. n. 10.*; Vndè loco regulæ exclusiue Nobilium nouitè creatorum ad tertiam generationem, appositæ in prædictis pactis, initis intèr Sacram Regiam Maiestatem, & Serenissimam Rempubicam, relatis per præallegatum *Zalaszouski d. to. 1. f. 368. n. 21.*, habet locum exceptio incontinenti apposita ibi = *exceptis ijs qui in exercitu fuerint benemeriti &c. vel ijs, quos ex antiquis externorum familijs ad Indigenatum recipiemus.* =

Eiusdem irrelevantiæ erit exceptio, quod in similibus Nobilium creationibus requiratur præsentia, & consensus Ordinis Senatorij, & Equestris, quodquè nobilitandus recommendari debeat à dd. Republicæ Ordinibus, & cum eorum assensu ad nobilitatem assumi; Quoniàm, vt suprâ diximus, nos non sumus in casu nouæ, & recentis creationis Nobilis, sed in declaratione antiquæ conspicuæ, & peruetustæ nobilitatis facta à Rege, Cuius intuitu, & contemplatione ad prærogatiuas Indigenatus, & Nobilitatis Polonæ Profapiam de Meliorucijs admittit, & irrefragabile Testimonium per eius Regium Diploma de agnitione illius Nobilitatis dedit; Vndè cessabat necessitas solemnitatum in noua, & recenti creatione Nobilis requisitarum; Sed nihilominus illas superabundantè intercessisse, constat ex tenore Regij Diplomatis ibi = *Nobis, & Maiestati nostræ Regiæ commendatum &c.* = & paulò inferiùs ibi = *In præsentia tam Senatorum, quàm Dignitariorum, & Officialium Regni, ac Equestris Ordinis &c. adstantium, huncq; actum inspicientium publicè creauimus &c.* = àc maiori, & specialiori nota, & ponderatione digna, sunt subsequentià verba in eodem Regio diplomate apposita ibi = *More antiquorum Nobilium Regni nostri, habiles, & idoneos, omniumque prærogatiuarum, honoris, tituli &c. capacem cum eius Successoribus reddidimus &c.* = Ex quibus quidè verbis omnis adempta remanet difficultas circà capacitatem D. Equitis Georgij Meliorucij, obtinendi beneficia, ad differentiam descendentiũ à Nobili recentè, & nouitè creato, quibus nonnisi post tertiam generationem ad eadem Beneficia aspirare licet.

Non officit demùm, quod Dominus Eques Dominicus Maria Meliorucius Pater D. Prouisi, post dictam admissionem ad prærogatiuas Indigenarum, & Nobilium Poloniæ, Mercaturam per aliquot annos, mediantebus eius Factoribus, & Ministris exercuerit; Quæ in re prænotandum in facto, quod ob nimis notos Regni Poloniæ motus, & acerrimi Belli calamitates, ac assiduas grauantissimas contributiones, timuit dictus Dominus Eques Dominicus Maria, nè eius peruetusta, & conspicua familia honoribus, & prærogatiuis etiam in Regno Poloniæ adaucta in paupertatem redigeretur, ex qua nobilitas ipsa contemptui, ac ludibrio esset, ac manca, & mutila iuxta Sententiam *Tiraquell. de Nobilitat. capit. 25. num. 9.*; scie-



sciebat enim ipse, quod mundi Nobilitas nil aliud est, quàm inue-  
teratæ diuitiæ *Tiraquell. citato tractat. cap. 3. num. 8., & 9.,* quod-  
que, vt quis Nobilis existimetur vltra Progenitorum virtutem, opu-  
lentiã copulatiuè requiritur ibidem *n. 11.* Vnde ad conseruandas fa-  
cultates, & opulentiam vnicum, & præcipuum nobilitatis fundamen-  
tum, ad Mercaturæ (non quidem vilis, sed quæ in Anglia Hollan-  
dia, Lusitania, Etruria, Ianua, & quàm plurimis Orbis partibus, No-  
bilitati non præiudicat *Teste Scominouio l. prima institut. fol. 69.*) re-  
fugium se conuertit, illamque durante temporum calamitate  
exercuit.

Hoc facto posito, occurritur exceptioni, fundatæ in d. Mercaturæ  
exercitio, cum duplici responsione. Prima quod exercitium cuius-  
libet artis nobilitati repugnantis, nocet quandiù quis in eo versa-  
tur, & non vltra, *Mandel. conf. 43. per tot., Tiraquell. de nobilit. cap.  
33., & 35. per tot. Fontanell. dec. 292. paritèr per tot.*

Secunda quod quando agitur de nobilitate proueniente à Sanguine,  
non amittitur per exercitium alicuius artis per aliquem exercite,  
quã non potest præiudicare nobilitati ab Antecessoribus in poste-  
ros deriuatæ *Tiraquell. de Nobilit. cap. 35., Noal. de transmiss. cas. 29.  
n. 25., & seq. cum alijs per Rot. dec. 213. n. 10., & seqq. par. 13. rec.,  
Vrceol. consult. forens. qu. 55. n. 45., & seqq.* Et quò ad admissionem  
ad prerogatiuas Nobilitatis Polonæ ex Regio Dyplomate, cum Rex  
nedum D. Dominicum Mariam Patrem, verùm etiàm eius Poste-  
ros, & descendentes ad illas admiserit, actus populares Patris non  
præiudicant filijs *Tiraquell. de Nobilit. d. cap. 35. n. 25.*

Hanc eandem veritatem concursus in D. Prouiso omnium qualitatum  
& requisitorum ad obtinendas quascumque Prælaturas Dignitates,  
& Canonicatus in quibusuis Cathedralibus, & Collegiatis Regni,  
agnouerunt, & testati fuerunt tam piè defunctus Celsissimus Epi-  
scopus Cracouiensis, quàm illius Reuerendissimus Suffraganeus in  
literis Testimonialibus d. D. Prouiso datis, quod quilibet Ordinarij,  
& illius Vices Gerentis Testimonium, summoperè iuuat, ad diri-  
piendas exceptiones incapacitatis d. D. Prouisi.

Et ita prò veritate respondendum Censui saluo sempèr &c.

*Ego Petrus Paulus Quintius V. I. D., ac in Romana Curia, & Sa-  
cro Rotæ Auditorio Causarum Patronus.*

*Leopoliensis. Canonicatus!*

**In Casu Collationis Canonicatus  
eiusdem Metropolitanæ  
Leopoliensis.**

Illmo D. Equiti Georgio de Melioru-  
cijs in Petrella VvientzlausKi.

*Responsum pro veritate.*

Typis Zinghi, & Monaldi 1719.



sidr0022386

Biblioteka Jagiellońska

